


आकाशवाणी रायपुर (छत्तीसगढ़)
प्रादेशिक समाचार बुलेटिन

18.10 भुक्रवार

दिनांक 17.04.2026



प्रमुख समाचार –

- 1– एक सौ छठवां संवैधानिक संसोधन अधिनियम–दू हजार तेईस, नारी शक्ति वंदन अधिनियम लागू हो गेहे।
- 2– झारखंड के हजारीबाग जिला के पिपरवार–करेदारी सीमा इलाका म आज सुरक्षाबल के संग होय मुठभेड़ म चार इन माओवादी मारे गिन।

अउ

- 3– मौसम विभाग ह अवइया तीन दिन म छत्तीसगढ़ के मध्य भाग म गरम हवा चले के दीस चेतावनी।

.....

नारी शक्ति वंदन अधिनियम–लागू

एक सौ छठवां संवैधानिक संसोधन अधिनियम–दू हजार तेईस, नारी शक्ति वंदन अधिनियम काली ले लागू हो गेहे। बछर दू हजार तेईस म संसद ह ए अधिनियम ल पारित करे रिहीस, जउन संघीय ढांचा के सबो स्तर के सार्वजनिक जीवन म महिला मनके बरोबर प्रतिनिधित्व ल बढ़ावा देय के दिसा म राष्ट्रीय यात्रा म ऐतिहासिक मील के पत्थर हे। ए महत्वपूर्ण कानून लोकसभा अउ दिल्ली राष्ट्रीय राजधानी क्षेत्र के विधानसभा के संगे सबो राज्य विधानसभा के सबो सीट म एक तिहाई सीट महिला मन बर बारी–बारी ले आरक्षित करथे।

प्रधानमंत्री ह किहीन हे कि नारी शक्ति सशक्त भारत के चिन्हारी आय। सोसल मीडिया म एक ठन संस्कृत सुभाषितम साझा करत प्रधानमंत्री ह नारी के शक्ति अउ योगदान ल सोरयाइन। प्रधानमंत्री ह यहू किहीन

कि देस के माई-बहिनी अउ बेटी मन आज अपन अटूट संकल्प, समर्पन अउ सेवा भाव ले हर क्षेत्र म देस के मान बढ़ावत हैं।

लोकसभा-नारी शक्ति वंदन अधिनियम

लोकसभा म संविधान के 131वां संशोधन विधेयक-दू हजार छब्बीस, परिसीमन विधेयक दू हजार छब्बीस अउ केंद्र शासित प्रदेश कानून संशोधन विधेयक दू हजार छब्बीस उपर चर्चा होवत हे। ए तीनों विधेयक के उद्देश्य लोकसभा राज्यसभा अउ केंद्र शासित प्रदेश के विधानसभा म महिला मनके भागीदारी ल बढ़ाना हे। तीनों विधेयक मन उपर आज मतदान होना हे।

प्रधानमंत्री ह सबो सांसद मन ले नारी शक्ति वंदन अधिनियम म संशोधन के समर्थन करे के आग्रह करिन हैं। सोसल मीडिया पोस्ट म श्री मोदी ह किहीन हे कि देस के लाखों महिला मन के नजर संसद, ओखर इरादा अउ फइसला उपर टिके हे। ओमन सबो राजनीतिक दल मन ले महिला आरक्षण के पक्ष म मतदान करे के अपील करिन।

छत्तीसगढ़ के राज्यसभा सांसद लक्ष्मी वर्मा ह महिला आरक्षण बिल ल 'अब्बड़ गरब के बेरा' बताइन अउ महिला सशक्तिकरण ल आगू बढ़ाय बर प्रधानमंत्री के धन्यवाद करिन।

केंद्र सरकार-नक्सलवाद

केंद्र सरकार ह राज्य सरकार मन ल सूचित करे हे कि देस म अब कोनो घलो नक्सल प्रभावित जिला नइये। केंद्रीय गृह मंत्रालय ह अपन पाती म छत्तीसगढ़ संगे आंध्रप्रदेश, बिहार, झारखंड, मध्यप्रदेश, महाराष्ट्र, ओडिशा, तेलंगाना अउ पश्चिम बंगाल ल सूचित करे हे कि सैंतीस जिला मन ल "विरासत अउ विकास जिला" के रूप म बांटे गेहे। उहें, एक ठन जिला ल "चिंताजनक जिला" घोसित करे गेहे। "विरासत अउ विकास जिला" ओ जिला हैं जउन नक्सली हिंसा ले पूरा तरह ले मुक्त हैं। उहें, "चिंताजनक जिला" ओ जिला हैं जिंहा नक्सली

हिंसा उपर नियंत्रण पाय गेहे। फेर अवइया बेरा म सरलग सुरक्षा अउ बिकास के जरूरत हे। उहें, झारखंड के पश्चिम सिंहभूम जिला इक्तीस मार्च के बाद एकमात्र “चिंताजनक जिला” के रूप म सूचीबद्ध हे।

छत्तीसगढ़-जनगणना

छत्तीसगढ़ म जनगणना-बछर दू हजार सत्ताईस के पहिली चरण के तहत स्व-गणना प्रक्रिया काली ले सुरू हो गेहे। ए कारज ह तीस अप्रैल तक चलही। एखर बर नागरिक मन पोर्टल म जाके अपन जानकारी स्वयं दर्ज कर सकत हें। रइपुर म मुख्य सचिव विकास शील ह स्व-गणना के तहत अपन जानकारी दर्ज करिन। ए मउका म अपर मुख्य सचिव मनोज कुमार पिंगुआ अउ जनगणना निदेशक कार्तिकेय गोयल मौजूद रिहीन। ए बेरा अधिकारी मन लोगन ले स्व-गणना के उपयोग करे के अपील करिन हें। एखर बाद एक-मई ले तीस मई तक प्रगणक घर-घर जाके मकान सूचीकरण अउ गणना के कारज करहीं।

बातों-बातों-में

सुनइया मन ल प्रादेशिक समाचार एकांश के समसामयिक बिसय उपर आधारित कारीकरम “बातों-बातों-में” ए दारी जनगणना-बछर दू हजार सत्ताईस उपर छत्तीसगढ़ के जनगणना निदेशक कार्तिकेय गोयल ले लेय गे भेंटवार्ता के प्रसारण होही। जेला काली अट्टारा अप्रैल के आकाशवाणी केंद्र रइपुर डहार ले एफ.एम. अउ प्रायमरी चैनल म बिहनिया नौ बजे ले करे जाही। एला छत्तीसगढ़ के जम्मो आकाशवाणी केंद्र एक्के संघरा रिले करहीं।

माओवादी-मुठभेड़

झारखंड के हजारीबाग जिला के पिपरवार-करेदारी सीमा इलाका म आज सुरक्षाबल के संग होय मुठभेड़ म चार झन माओवादी मारे गिन। एमा माओवादी उप-क्षेत्रीय कमांडर सहदेव महतो घलो सामिल हे, जेखर उपर पंद्रह लाख रूपिया के इनाम रिहीस। घटनास्थल ले भारी मात्रा म हथियार, गोला-बारूद अउ माओवादी जिनिंस बरामद करे गिस।

प्लांट हादसा-एफआईआर

सक्ती जिला के वेदांता पावर प्लांट हादसा म पुलिस ह वेदांता समूह के मुखिया अनिल अग्रवाल के संग दस लोगन के खिलाफ केस दर्ज करे हे। औद्योगिक सुरक्षा विभाग के सुरुआती जांच म पता चलिस कि प्लांट म सुरक्षा मानक के पालन म लापरवाही बरते गे रिहीस।

बतादन कि बीते चौदह अप्रैल के प्लांट म होय हादसा म अब तक इक्कीस झन श्रमिक मनके मउत हो चुके हे। पुलिस ह प्लांट ले जुड़े अधिकारी अउ प्रबंधन के जिम्मेदारी तय करत जांच सुरु कर देहे। उहें, राज्य सरकार ह घटना ल गंभीर बतावत दोषी मन उपर कड़ा कारवाही के निरदेस देहे। हादसा के कारण के बिस्तार ले जांच चलत हे।

इही बीच, नेता प्रतिपक्ष डॉ. चरणदास महंत ह पत्रकारवार्ता म किहीन कि- 'राज्य सरकार के डहार ले उद्योग मन म श्रमिक मन के सुरक्षा उपर कोनो धियान नइ दे के सेति प्रदेस म दुर्घटना होवत हैं। वेदांता प्लांट मामला म सरकार डहार ले ही प्रबंधन अउ उंखर ले जुड़े मनखे के खिलाफ बहुतेच सामान्य धारा म केस दर्ज करे गेहे, जउन जमानतीय हे। ओमन ए मामला के जांच हाईकोर्ट के जज ले कराय के मांग करिन।

उहें, कांग्रेस के प्रदेस अध्यक्ष दीपक बैज ह घलो आरोप लगाइन कि-उद्योग विभाग अउ संयंत्र प्रबंधन के लापरवाही के सेति पावर प्लांट म घटना घटिस। अगर श्रमिक मनके सुरक्षा उपर सावधानी बरते रतिन, त अतेक बड़े जनहानि नइ होतिस।

हज यात्रा

बछर दू हजार छब्बीस के हज यात्रा काली ले सुरु होवत हे। जायरीन के पहिली जत्था देशभर के आने-आने जघा ले सऊदी अरब बर रवाना होही। अल्पसंख्यक कार्य मंत्रालय ह बताइस कि एक लाख पचहत्तर हजार ले जादा जायरीन के भारत ले हज यात्रा म सामिल होय के उम्मीद हे। अल्पसंख्यक कार्य मंत्री किरें रिजिजू ह बताइन कि मंत्रालय ह जायरीन के सेवा ल बेहतर बनाय बर ए बछर नवा उदीम करे गेहे।

मौसम

अउ अब पेस हे मौसम के हाल...

मौसम विभाग ह अवइया तीन दिन म छत्तीसगढ़ के मध्य भाग म गरम हवा चले के चेतावनी देहे। ए बेरा अधिकतम तापमान म एक ले तीन डिग्री सेल्सियस बाढ़ सकथे। एखर असर रइपुर, दुरूग अउ बिलासपुर संभाग म देखे बर मिलही। उहें, ए दउरान बस्तर संभाग के दक्षिण हिस्सा म गरज-चमक के संग छींटा पड़ सकत हे। संगेसंग अवइया चौबीस घंटा म बस्तर संभाग के एक-दू जघा गाज गिरे के संग हवा गरेर के घलो चेतावनी देय गेहे।

संक्षिप्त समाचार

— छत्तीसगढ़ मेडिकल सर्विसेज कार्पोरेशन म करीबन पांच सौ पचास करोड़ रूपिया के मेडिकल उपकरण खरीदी मामला म ईओडब्ल्यू ह चार झन नवा आरोपी के खिलाफ पूरक चालान पेस करिन।

- बालोद जिला के संबलपुर एसबीआई कियोस्क केंद्र म ग्राहक मन ले नौ लाख रूपिया के धोखाधड़ी करइया दू आरोपी गिरफ्तार होइन।
- जिला रोजगार अउ मार्गदर्शन केंद्र रइपुर डहार ले अग्निवीर भर्ती परीक्षा के तियारी बर युवा मन ल 4 मई ले 4 जून तक निसुल्क प्रसिक्षण दे जाही। एखर बर 30 अप्रैल तक आनलाइन पंजीयन कर सकत हैं।
- रइपुर–दुरुग रद्दा के कुम्हारी म खारून नदी म बने पुलिया के मरम्मत के बाद अवई–जवई सुरु हो गेहे।

अउ

- महासमुंद जिला म एंटी करप्सन ब्यूरो ह ग्राम पंचायत बेमचा के सरपंच ल एक लाख रूपिया के रिस्वत लेवत रंगेहाथ गिरफ्तार करिस।

